

NA Archief Graven van Holland inventarisnummer 66-67 LRK 51 XII folio 16v-17
gedateerd 28 augustus 1399

heer Adam Millinc erfleen

Willaem etc. doen cond allen luden dat voir ons quam heer Adaem Millinc
ridder ende virsocht voir ons ter goeder tijt sulke goede lant ende erve
als hier gescreven volget. Item XIII mergen lands gelegen in onsen lande van
Althenae inden gerechte van Rijswijc. Item vijftehalf mergen lands gelegen
in onsen lande voirsch inden gerechte van Woudrichem. Item die tweedeel vanden
groter tyende gelegen tot Uppel op sulken pacht als optie selve tweedeel
vanden tienden staet, welke goeden lands ende tyenden voirnoemt wij ver-
lyen ende verleent hebben, verlyen ende verlenen heren Adaem Millinc
voirsch te houden van ons ende van onsen nacomelingen him ende sinen
nacomelingen

ten rechten erfleen niet te versterven in allen schijn als heer Lambrecht Millinc
heren Adaems vader die voirnoemde goeden van heren Willem heer van Huerne
te houden plach. Hier waren over onse getruwe manne Jan heer van Brederode,
Jan van Heemstede, ridder, ende anders veel goeder luden. In orconde etc. Gegeven
inden Hage

XXVIIIe dage in Augusto anno XCIX

Vrou Alijt heer Adaems Millinc wijff lijfftocht

Willam etc. doen cond allen luden dat voir ons quam heer Adam Millinc
ridder, ende makede mit sinen vryen wille ende mit onsen hant die wij om
sijnre bede wille der toe gedaen hebben vrou Alyde sinen wive Jan Oems
dochter die mynre helfte van sulker goede lande ende tyende als hierna
gescreven volget. Item XIII mergen lands gelegen in onsen lande van Althenae
inden gerechte van Rijswijc. Item vijftehalf mergen lands gelegen in onsen
lande voirsch inden gerechte van Woudrichem. item die tweedeel vanden
groter tyende gelegen tot Uppel tot hoirre rechter lijfftochte vryelike
te gebruiken also lange te gebruiken als vrouwe Alyden voirsch in leven-
de live is. Ende geloven der selver vrouwe Alyden inder voirsch
lijfftochte te houden ende te starken tgegen allen den genen die hair dair
in vircortende vironrechten ofte hindernisse doen wilden. Hier waren
over onse getruwe manne Jan heer van Brederode, Jan van Heemstede,
ridder, ende anders veel goeder luden. In orconde etc. Gegeven inden Haghe XXVIII
dage in Augusto anno XCIX

Transcriptie ALH